

四庫全書

集部

欽定四庫全書

集部

文忠集卷首

詳校官庶吉士_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于時和

欽定四庫全書

集部四

文忠集

別集類三 宋

提要

臣等謹案文忠集二百卷宋周必大撰必大
字子充廬陵人紹興二十一年進士復中宏
詞科官至右丞相封益國公致仕贈太師謚
文忠事蹟具宋史本傳必大以文章受知孝
宗其制命溫雅文體昌博為南渡後臺閣之

冠考据亦極精審歸然負一代重名著作之
富自楊萬里陸游以外未有能及之者是集
即史所稱平園集者是也開禧中其子綸所
手訂以其家嘗刻六一集故編次一遵其凡
例為省齋文稿四十卷平園續稿四十卷省
齋別稿十卷詞科舊稿三卷掖垣類稿七卷
玉堂類稿二十卷政府應制稿一卷歷官表
奏十二卷奏議十二卷奉詔錄七卷承明集

十卷辛巳親征錄一卷龍飛錄一卷歸廬陵
日記一卷閒居錄一卷泛舟遊山錄三卷乾
道庚寅奏事錄一卷壬辰南歸錄一卷思陵
錄一卷玉堂雜記三卷二老堂詩話二卷二
老堂雜誌五卷唐昌玉菴辨証一卷近體樂
府一卷書稿三卷劄子十一卷小簡一卷其
年譜一卷亦綸所編輯又祭文行狀謚誥神
道碑等別為附錄四卷終焉陳振孫謂初刻

時以奉詔錄親征錄龍飛錄思陵錄十一卷
所言多及時事託詞未刊鄭子敬守吉時募
工人印得之世始獲見完書今雕本久佚止
存抄帙其玉堂雜記二老堂雜誌等編世亦
多有單本別行者既已各著於錄而茲集所
載則依原書編次以存其舊焉乾隆四十四
年正月恭校上

總纂官_臣紀昀_臣陸錫熊_臣孫士毅

總校官臣陸費墀

文忠集原序

天之降才固已不同而文人之才尤異將使之發冊作命陳謨奏議則必畀之以閑富淹貫溫厚爾雅之才而處之以帷幄密勿之地故其位與才常相稱然後其文足以紀非常之事明難諭之指藻飾治具風動天下書黃麻之詔鏤白玉之牒藏之金匱石室可謂盛矣若夫將使之闡道德之原發天地之祕放而及于鳥獸蟲魚草木之情則畀之才亦必雄渾卓犖窮幽極微又畀以

遠游窮處排擯斥疎使之磨礪齟齬瀕于寒餓以大發其藏故其所賦之才與所居之地亦若造物有意于其間者雖不用于時而自足以傳後世此二者造物豈真有意哉亦理之自然古今一揆也大丞相太師益公自少壯時以進士博學宏詞疊二科起家不數年歷太學三館予實定交于是時時固多少年豪雋不羣之士然落筆立論傾動一座無敢撓其鋒者惟公一人中雖暫斥而玉烟劍氣三秀之芝非窮山腐壤所能湮沒復出

于時極文章禮樂之用絕世獨立遂登相輔雖去視草之地而大詔令典冊孝宗皇帝獨特以屬公於戲聖主之心亦如造物非私公以富貴益大官重任不極不久則無以盡其才也公既薨逾年公之子綸以公遺文號省齋文稿者屬予為之序公在位久崇論宏議豐功偉績見于朝廷傳之邊徼者何可勝數予獨論其文者墓有碑史有傳非集序所當及也開禧元年十二月甲子

陸游謹序

欽定四庫全書

文忠集卷首

年譜

靖康元年丙午

是歲公之外王父給事

親

知平江府皇考秦公偕皇

妣秦國夫人隨侍七月十五日巳時公生於府治

建炎元年丁未

五月高宗即位改元

建炎二年戊申

是歲大父秦公倅廬陵皇考奉使湖湘因挈家歸省

建炎三年己酉

是歲車駕在維揚大父秩滿入覲皇考隨侍薨於揚州

建炎四年庚戌

紹興元年辛亥

紹興二年壬子

紹興三年癸丑

紹興四年甲寅

紹興五年乙卯

公年十歲

紹興六年丙辰

是歲外祖母衛國宋夫人過廬陵皇妣奉大母秦國
張夫人之命挈公及姊弟隨侍寓於信州乃命公從
汲人陳持學

紹興七年丁巳

是歲衛國宋夫人薨皇妣哀毀致疾

紹興八年戊午

正月乙巳皇妣秦國夫人薨二月壬申權厝于州北

茶山時伯父金紫將漕廣東道出上饒挈公及姊弟
以歸

紹興九年己未

紹興十年庚申

是歲金紫罷官北歸公隨侍留贛

紹興十一年辛酉

紹興十二年壬戌

紹興十三年癸亥

紹興十四年甲子

紹興十五年乙丑

公年二十

紹興十六年丙寅

紹興十七年丁卯

是歲金紫再守辰州公侍行

紹興十八年戊辰

紹興十九年己巳

是歲金紫丁張夫人憂公隨侍歸贛

紹興二十年庚午

正月合葬大父泰公張夫人于吉州廬陵縣膏澤鄉
金鳳山林是秋公與廬陵薦送

紹興二十一年辛未

是歲公擢進士第授左迪功郎徽州司戶參軍司封
郎官王公葆許以女妻公公復歸贛

紹興二十二年壬申

是秋齊述叛公徙居于吉冬權贛州雩都縣尉

紹興二十三年癸酉

是歲公親迎于平江之崑山

紹興二十四年甲戌

十二月改差監行在太平和劑局門士寅到任寓漾

沙坑

紹興二十五年乙亥

公年三十

紹興二十六年丙子

正月庚戌子綸生六月己亥晦北鄰王運屬家火延燒數十家公坐是去官時外舅王公守廣德公挈家過之因少畱

紹興二十七年丁丑

是歲公中博學宏詞科差充建康府府學教授循左

修職郎

制詞勅左迪功郎新差充建康府府學教授周某國家自紹聖以來設詞學一科蒐取異

能之士行之既久所得為多肆朕中興斯文益振今試于春官者數十輩而爾以粹文獨與斯選拔尤若此

陞秩匪褒姑游泮宮以竣甄擢可特
授左修職郎差遣如故周麟之行

紹興二十八年戊寅

二月癸巳到任

紹興二十九年己卯

七月壬寅漕檄考試宣城八月壬子朔抵宣城入試

院九月丙戌還官所

紹興三十年庚辰

二月癸酉除太學錄

制詞左修職郎周某右可特授
依前左修職郎太學錄填見闕

勅左文林郎蔣芾等朕恢復學校崇重師儒唯採擇之加詳故除授之不數以爾芾學問淵源甲科之選其譚經師席以迪多士以爾某藻思駿發詞學之英其錄于學事以肅規矩夫科目名也職業實也朕既以名取之必試之以事庶考爾之實焉尚勉之哉可依前件葉謙亨行

四月庚戌供職六月循左文林郎八月乙卯子柔弟卒九月丁丑公召

試館職戊戌入和寧門赴學士院試策癸卯除秘書

省正字

制詞左文林郎即行太學錄周某某等特授依前左文林郎秘書省正字勅左文林郎行太

學錄周某某等蘭臺圖書之府英俊是儲然預遊其間者必試之而後用朕所以遵祖宗之訓也以爾某文詞之偉早擢異科爾大昌問學之優有聲庠校茲命策之翰苑酬對可觀並輟成均之聯往正中祕之籍

益思涵養以俟簡求
可依前件楊邦弼行

十月己巳輪對後殿

紹興三十一年辛巳

三月己丑被宣赴垂拱殿受勅克公試補試類考校
官四月庚午改授左宣教郎十月丁亥兼國史院編
修官

紹興三十二年壬午

五月庚子除監察御史

制詞勅左宣教郎秘書省正
字兼權國史院編修官周某

朕招選時髦儲之冊府以須不次之用蓋亦居久而
後察也爾華瞻之文燦于給札篤實之論具于奏篇

斯固察識之矣擢居憲府助朕耳目孰曰不宜汝其雍容臺評茂著賢業其日新於譽處式務稱於所蒙可特授依前左宣教郎守監察御史唐文若行六月孝宗即位七年己酉皇

帝親饗太廟攝光祿丞行事壬戌覃恩轉左奉議郎

制詞左宣教郎守監察御史周某某右可特授左奉議郎依前守監察御史勅左宣教郎守殿中侍御史張震等朕以初政之臨祇奉慈訓爰推慶澤溥及萬方凡爾有官咸進厥秩矧居臺省親被寵光往其欽承以對休命可依前件劉珙行八月戊寅皇帝詣德壽宮奏上太上

皇帝太上皇后尊號冊寶奉勅舉太上皇后尊號寶

行事丁亥除起居郎

制詞勅左奉議郎守監察御史周某某典謨不作惟勛華授受之

心與夫一時賡歌出治之道世果得而傳耶國家繼
繼承承赫然若前日事固足以上追千載而無慚予惟
夙夜祇惕以無忘元首股肱之戒實自茲始爾高詞
懿學拔自名場茲副簡求冠于螭陛言動之記汝得
以親承論思之職汝得以參與稽古在昔二美斯存
尚勉猷為以光述作可特授依前左奉議郎試起居
郎唐文

若行 九月丁未兼編類聖政所詳定官丁巳兼權
中書舍人又時暫兼權給事中

隆興元年癸未

三月甲辰同金給事安節繳龍大淵曾覲除知閤指
揮戊午入奏以遷祔乞祠主管台州崇道觀五月至

寧都省尚氏姊六月壬午至吉寓居永和鎮本覺寺

隆興二年甲申

乾道元年乙酉

公年四十夏六月磨勘轉左承議郎十一月再任台

州崇道觀

乾道二年丙戌

三月尚氏姊卒十月公如上饒遷奉皇妣秦國夫人
之柩歸廬陵十二月丁酉襄奉於膏澤鄉長岡之源

別求輔穴英子弟公各為之誌

乾道三年丁亥

三月壬寅攜家泛舟入浙省外舅疾乙丑達宜興八月丙申磨勘轉左朝奉郎戊午發宜興十二月丙申至吉

乾道四年戊子

四月除權發遣南劍州

乾道五年己丑

乾道六年庚寅

是歲南劍闕到當奏事四月丁亥舟發永和戊戌至
豐城己亥得省劄改除閩憲五月己亥抵崑山六月

丁丑祗受告命

制詞勅左朝奉郎權發遣南劍州軍
州主管學事兼管內勸農事周某某朕

分遣使輶數求民瘼謂與其試材於疏遠堙微之士
則孰若借重于踐揚望實之人茲適原隰之行乃得
絲綸之舊將令速俗識我近臣爾文拔春華學推武
庫蜚聲場屋兩枝仙桂之相高寓直禁林三峽詞源
之爭驚自厭承明之直久嗟太史之留茲俾按於祥
刑姑少觀於儒效其謹六條之察俾無庶獄之寃佇
訖外庸嗣膺殊渥可特授依前左朝奉郎權發遣福
建路提點刑獄公事兼本路勸農提舉河渠公事填

現闕仍借緋王拒行是日入北關門七月壬辰入和寧門對於

後殿丙申除秘書少監兼直學士院

制詞勅左朝奉郎周某士之致

遠器識為先古有格言朕嘗三復故雖以科目取士而不專以文藝用也爾以儒術第進士奮詞業應為時用常顯於朝矣比觀入對益知涵養茲釋憲臺之寄俾從道山之游峻直鑒坡職清地邃維少令參太史之事庶資直諒而北門當視草之任正繫才華若夫是古而非今矜名以眩實如俗儒所為者朕實鄙之宜知所趨以對休命可特授依前左朝奉郎試秘書少監兼直學士院鄭聞行是日又受

磨勘轉左朝散郎告九月戊子兼國子院編修官兼

實錄院檢討官十一月庚寅車駕朝獻景靈宮太廟

卷首
壬午郊祀大禮皆充讀冊官行事

乾道七年辛卯

正月丙子朔太慶殿發太上皇帝壽聖皇后加上尊

號冊寶攝禮侍奏嚴外辦又差充舉保行事三月丁

酉上御正殿授皇太子冊寶捧寶行事五月乙亥朔

兼權兵部侍郎七月士辰除權禮部侍郎丁酉有旨

仍兼權直學士院升同修國史實錄院同修撰

制詞
勅朕

遠指載郁之文監於二代孰副於寅之命僉曰伯夷
是咨能賢俾貳掌禮左朝散郎試秘書少監兼權直

學士院兼國史院編修官實錄院檢討官兼權兵部
侍郎周某尚古作者為時聞人德性守於宮庭常特
立獨行而不顧文聲諧於韶護有一唱三嘆之遺音
朕夙聞其摘藻之工嘗試以出綸之任乃方羊而難
進雖回遠以益光逮茲再見之期年安有用賢而累
日亟躋禁列以贊春卿夫問揖遜之儀者何足以治
神人聽鏗鏘而已者何足以被動植其頤中和之致
來資制作之成益尊見聞嗣有選任可特授依前左
朝散郎權尚書禮部侍郎兼權直學士院
兼權修國史實錄院同修撰范成大行 九月己卯

兼侍講

歸制詞朕勅當萬幾之暇玩好都捐探六藝之

諸儒左朝散郎權尚書禮部侍郎兼權直學士院兼
同修國史實錄院同修撰賜紫金魚袋周某富瞻詞
源酌焉不竭淵澄學海測之益深曩以才華而收宏
博之科今以器識而處直清之任茂膺茲選孰曰不

宜夫會有本源豈在於斷句離章之末約歸簡易庶明于至德要道之端罄爾多聞副予遜志可特授依前左朝散郎權尚書禮部侍郎兼直學士院兼同修國史實錄院同修撰兼侍講賜如故林機行

乾道八年壬辰

正月庚辰時暫兼權中書舍人二月癸丑張說王之奇除簽樞並上章辭免新命公入奏未敢撰不允詔草乙卯有旨與在外宮觀日下出國門六月己未至吉庚申挈家入望雲門新居

乾道九年癸巳

正月除知建寧府

制詞勅左朝散郎賜紫金魚袋周某言語侍從之臣朕所望以朝夕

論思日月獻納者也間有均佚於外願瞻在列念之不忘况嘗典朕三禮分直北門以有顯庸者乎式圖爾居莫如南服爾宏才與學獨步一時大冊雄文推高兩禁簪筆入侍知無不為乃眷賢勞久安祠觀建寧吾潛藩其俗僥武而尚氣可以義服不可以力勝顧豈輕畀哉昔王仲舒為蘇州刺史唐穆宗謂其文可思最宜為誥朕於汝幾是矣善撫吾民嗣有異寵可特授依前左朝散郎知建寧軍府事提舉學事兼管內勸農事替任文薦到任成資闕賜如故王淮行公再請祠不允八月戊辰

挈家離吉舟次豐城復以疾告九月丁巳提舉江州

太平興國宮十月丁丑公還吉

淳熙元年甲午

正月磨勘轉朝請郎四月戊寅除右文殿修撰

制詞
勅朝

請郎提舉江州太平興國宮賜紫金魚袋周某朕臨
朝思治稽古右文惟時著撰之華晉與嚴凝之直儻
非名勝曷副選掄爾學探道源才標國器論事据昔
人之正能言推當世之工蚤參兩禁之游雅擅三長
之譽討論潤色豈徒追鄭國之賢能獻納論思固已
備漢臣之風采粵從補外久遂養恬即書殿以聯榮
俾儒林之增重宜承眷渥以俟時陞可特授依
前朝請郎充右文殿修撰差遣賜如故王淮行
十二

月召赴行在

淳熙二年乙未

公年五十

正月丙午公離吉二月甲子次餘干縣省外姑三月

庚子入國門壬寅對於隱岫癸卯除敷文閣待制侍

講

制詞勅簪筆禁林執經帝幕有議論從容之益無簿書倥偬之勞自非名儒不在茲選朝請郎充右

文殿修撰賜紫金魚袋周某提剛方之操守端靜之規早脫穎於羣英即遍儀於華貫起嗣真祠之逸來膺宣室之咨朕方稽二帝三王之心以圖康乂爾惟富六藝百家之學宜共講明爰錫贊書俾躋重席茲益親於畫接其備告於辰猷可特授依前朝請郎充敷文閣待制侍講賜如故湯邦彥行

六月士

戌兼權兵部侍郎八月丁卯兼直學士院閏九月癸

且除兵部侍郎

制詞勅國家之設武部職固簡於周官論思之屬從臣任特隆於漢制惟

兼需於猷告是每嘆於才難朝請郎充數文閣待制
侍講兼權兵部侍郎兼直學士院賜紫金魚袋周某
事幾先見其微議論不負所學粵從閒館召置西清
資爾文以黼黻予言藉爾識以訏謨古義間者五兵
之虛位嘗令三組以交垂迨此暇時具尺籍五符而
不調迺能極意夕修晝訪而有明既不當積日以爲
功亦何待爲真於滿歲其祗新渥以究遠謨教民而
可以即戎固無忌於率典敬王則不陳非道其益務
於高心可特授依前朝請郎試尚書兵部侍郎兼直學士院賜紫金魚袋
制詞勅朕惟總攬萬幾之餘探賾六經之粹於春秋
繫事雖因廣記而備言然褒貶成文莫非懲惡而勸
善疇咨宏博入奉燕閒朝請郎試尚書兵部侍郎兼
直學士院賜紫金魚袋周某名擅儒宗學臻聖域自

徧儀於禁路實備竭於嘉猷既侍金華之講以濬其淵源又參玉堂之直以據其藻麗肆為真於武部爰申命於通英俾加紬繹之勤以助緝熙之益載念仁皇可傳之法深明仲尼不刊之書丁度開其端宋綬繼其後皆嘗以從容之際而見乎答問之間朕仰遵列祖之規模方資折衷爾其攷三傳之同異以廣發揮益思古訓之稽庶獲多聞之效可特授依前朝請郎試尚書兵部侍郎兼侍講兼直學士院賜如故蕭燧行

十月丙申魚太子詹事十一月戊申朔大慶殿太

上皇帝壽聖皇后加上尊號冊寶權禮侍押寶案十

二月辛巳磨勘轉朝奉大夫

制詞勅周人序羣吏之勞以八柄而馭貴虞氏

雖九官之列猶三考而陟明庸昭考核之公不以崇卑而間朝請郎試尚書兵部侍郎兼侍講兼直學士

院兼太子詹事賜紫金魚袋周某忠多裨益朕所深知祿位每加身愈恭而退遜闕閤所積更以時而舉颺肆循品秩之常爰行褒進之律是云信賞豈用賢而日月為功顧猶歷階示惟君之名器不假儻更論思而有補會令猷念以相從其究爾庸以若茲訓可特授朝奉大夫依前試尚書兵部侍郎兼侍講兼直學士院兼太子詹事賜如故程大昌行

淳熙三年丙申

正月丙辰借兵部尚書永寧侯押伴金國賀正旦人

使御筵於赤岸三月辛未德壽慶典封管城縣開國

男食邑三百戶

制詞勅朕為歲歷相推有運無積慈極在上常壽且康八千為春平格之

休滋至五十而慕燕寧之日方長若時通聯宜同茲
慶朝奉大夫試尚書兵部侍郎兼侍講兼直學士院
兼太子詹事賜紫金魚袋周某靜淵以敏亮直而文
為言語侍從之臣豐於裨益凡君臣父子之懿多所
發揮比從簪筆之班誕揚奉冊之意覽而心善知深
中此情宜古謂色難喜獨臻於順適以比周行之衆
當膺大賚之施其啟封列爵之初仍錫壤井腴之富
盍茂輸于忠藎用上答于褒揚可特授依前朝奉大
夫試尚書兵部侍郎兼侍講兼直學士院兼太子詹
事特封管城縣開國男食邑三百戶賜如故程大昌
行

太上日歷成四月丙戌轉朝散大夫

制詞勅紹承天統思協帝

華巍乎其有成功具存三紀之政寶之以為大訓宜
垂四繫之文繫予侍從之臣當居太史之職奏篇來
上第賞有差朝奉大夫試尚書兵部侍郎兼侍講兼
直學士院兼太子詹事管城縣開國男食邑三百戶

賜紫金魚袋周某學富而問多氣和而守正偏儀清
近蔚有聲光書命之行當時未有及者禮樂之任疑
義皆取決焉茲寓直于禁林復陞華于講席大典一
出于其手嘉謨屢沃於朕心顧千卷之信書藉諸儒
之緒業夷攷所居之官重亮知載筆之功多肆答賢
勞晉陞文秩其對揚于休命當嗣有於褒遷可特授
朝散大夫依前試尚書兵部侍郎兼侍講兼
直學士院兼太子詹事封賜如故劉孝韙行 九月甲

辰兼侍讀

制詞勅朕延宏博之英侍清閒之燕以六
經載道既詳究于指歸顧列聖貽謀其可

忘于矜式宜就陞於位次俾進讀於朕前覲大起於
治功豈直為於觀美朝散大夫試尚書兵部侍郎兼
侍講兼直學士院兼太子詹事管城縣開國男食邑
三百戶賜紫金魚袋周某蚤以高明之學徧揚華近
之途正直不同多所論思之益文章有體形于播告
之修自參簪筆之聯屢在橫經之列訪問多至中夕

啟沃益非一朝時方率由于舊章必求明習于故事繫衆所望非卿而誰選者儒以質史疑朕豈愧開元之主讀寶訓而先政體爾當如康定之臣可特授依前朝散大夫試尚書兵部侍郎兼直學士院兼太子詹事兼侍讀封賜如

故劉孝韙行

十月丙子文德殿發中宮冊寶進解

嚴牙牌十一月壬子上自太廟登玉輅過青城郊祀大禮充執綏官辛酉赴璿璣觀奏告奉安北斗神像幹辦本宮霍汝弼傳旨賜香茶十二月丙子車駕恭謝太乙宮次詣璿璣觀簪花御圃對御酒三行宣勸兩盞丁酉進封開國子加食邑二百戶

制詞勅玉輅以祀時乃周

道若陞侍於左執此良綏則屬文學之臣豈獨以密
近為榮實蓄所聞以俟有問朝散大夫試尚書兵部
侍郎兼侍讀兼直學士院兼太子詹事管城縣開國
男食邑三百戶賜紫金魚袋周某詳雅而釋回齊莊
而去偽正立之容迺有可觀自進發廟門至于壇宮
鸞鳴和應匪翼翼所以安予乘而肅民瞻也其嘉
汝有助哉今熙事既成所不愛于汝者子爵之進也
采邑之加也如使軍度戎物常以整脩聞則汝不負
于寵命者在是可特授依前朝散大夫試尚書兵部
侍郎兼侍讀兼直學士院兼太子詹事進封管城縣
開國子加食邑二百

乙未除吏部侍郎

制詞勅國昌
在於得士政

又闕於官人不謹鑒銓則公平機息弗清流品則倖
冒實繁雖設長以聽焉庸擇才而貳此朝散大夫試
尚書兵部侍郎兼直學士院兼太子詹事兼侍讀管
城縣開國子食邑五百戶賜紫金魚袋周某詳雅而
釋回齊莊

瑟體蹈忠醇學足以裕詢咨文足以華孚渙立朝所以見節而汝節之弗渝臨事然後見能而汝能之甚茂眷久參于圻父獲五戎咸整之稱德宜亞於冢卿底六叙脩修之績副予則哲尚爾克勤可特授依前朝散大夫試尚書吏部侍郎兼直學士院
兼太子詹事兼侍讀封賜如故陳駿行

淳熙四年丁酉

祐陵實錄成五月乙丑轉朝請大夫

制詞勅朕祗若
皇猷茂揚祖烈

惟祐陵在御蓋踰兩紀之年而實錄之書當傳萬世之信中更放失雖就編摩念猶闕于舊聞詔申加于載筆奏篇來上褒律是頒朝散大夫試尚書吏部侍郎兼直學士院兼太子詹事兼侍讀管城縣開國子食邑五百戶賜紫金魚袋周某學造淵源文知體要掌内外之制居多潤色之功歷講讀之官備整切副

之益茲勒成于大典當允賴於良才多所發明為之嘉歎用叙遷于華秩以顯答於舊勞其體朕恩益殫儒效可特授朝請大夫依前試尚書吏部侍郎兼直學士院兼太子詹事兼侍讀封賜如故劉孝韙行

丁卯除翰林學士

制詞勅朕攷唐室之制重翰苑之臣謂文誥悉由中書或有稽時之

弊以供奉改稱學士實專密命之司逮我本朝用為故事恩禮加異縉紳所榮既非他才之可居宜求己試而後用朝請大夫試尚書吏部侍郎兼直學士院兼太子詹事兼侍讀管城縣開國子食邑五百戶賜紫金魚袋周某心醇而履正學廣而問多早決異科徧儀禁路雖平居周密不言溫木之名而議事雍容時號繁花之論游寓鑾坡之直屢當編典之行掩盛事於前聞布大喜於天下凡號令一出其手猶卜筮罔不是孚副予遊簡之懷庸正久虛之席豈特資于潤色益欲備于疇咨裁大議于中是為內相之職舉

至治之要毋忘夜對之時尚退配于古人以永有于
休譽可特授依前朝請大夫充翰林學士知制誥太
子詹事兼侍讀封
賜如故劉孝謹行 六月辛巳忠翊郎學士院待詔錢

滋宣詔入院七月甲子兼修國史九月戊午同宰執

侍從宣赴芙蓉閣觀擊毬次內宴選德殿有和御製

詩十一月庚申磨勘轉朝議大夫

制詞勅朕侍非常之才不次而用計

羣吏之治應格乃遷是雖甘泉之舊臣不廢審官之
常法翰林學士朝請大夫知制誥兼太子詹事兼侍
讀兼修國史管城縣開國子食邑五百戶賜紫金魚
袋周某早由望實亟踐清華不名一長實兼數器以
文章則擅長楊書詔之美以顧問則備崔高古今之
知典禮直哉惟清作史質而不俚倚切廟于經席賴

卷一百一十五
贊護于儲闈學廣問多歷揚益著職親地禁禮遇方
隆顧惟助朕之居多奚待計功而後賞用遷華秩尚
爾因歲月之成亦使庶僚知朕重器名之意可特授
依前大夫依前充翰林學士知制誥兼太子詹事兼
侍讀兼修國史封
賜如故劉孝題行

淳熙五年戊戌

正月己未乞補外降詔不允三月甲寅被宣充御試
舉人詳定官五月丁酉對于隱岫得旨撰選德殿記
閏六月丙午進呈記文九月乙丑中使李裕文傳旨
令書丙寅所進書殿記壬申車駕幸祕書省賜宴右

文殿十月戊申轉中奉大夫

制詞勅望蓬萊隔弱水嚴列聖之寶儲約史記

修春秋奮宿儒之鴻筆肆予臨幸宜有恩榮翰林學士朝議大夫知制誥兼太子詹事兼侍讀兼修國史管城縣開國子食邑五百戶賜紫金魚袋周某學廣問多量宏德粹才兼數器徧儀遠近之朕史有三長深明筆削之旨逮茲清蹕之涖備觀汗青之勞爰錫贊書序遷崇秩萬世不刊之典允賴鋪張生平未見之書彌勞紬繹欽承茂渥益告嘉猷可特授中奉大夫依前充翰林學士知制誥兼太子詹事兼侍讀兼修國史封賜如故鄭丙行

壬子會慶節攝殿中監以盤盞授上公

十一月壬戌乞外祠降詔不允不得再有陳請甲申內直申時三刻宣至選德殿別令中使引至新立所

作記石之下傳旨云記文詞采贍蔚今初立石召卿
觀覽宣坐賜酒賜茶賜御書白居易七德舞七德歌
一軸丁亥進謝御書古風一首十二月癸巳除禮部

尚書兼翰林學士

制詞勅朕稽德于乾文惟亨嘉之
會以合禮求治于履象惟上下之

辨以定民實待人而後行故設官而是掌莫重文昌
之位用先清廟之才翰林學士中奉大夫知制誥兼
太子詹事兼侍讀兼修國史管城縣開國子食邑五
百戶賜紫金魚袋周某識達顯微學窮因造商瑚夏
璉可方其質之溫虞韞周章宜比其文之麗與聞封
拜之久宜居出納之尊予欲正國以權衡則汝承予
欲納民于防範則汝助毋鄙嚴蒸以為未母輕縣叢
以為迂秩宗本直清既已歸于姜伯為命工潤色豈

欲捨于國僑可特授依前中奉大夫試禮部尚書兼翰林學士兼太子詹事兼侍讀兼修國史封賜如故

陳騏行

丙辰端明殿簽押伴金國賀正旦人使御筵於

都亭驛

淳熙六年己亥

正月辛酉上辛祈穀初獻官二月丙午得旨撰文鑑

序四月辛卯進呈文鑑序日厯成書辛丑轉中大夫

制詞勅朕自膺傳緒累年于茲申命著廷直書無隱涉筆兼資於衆俊汗青至溢于千編九與纂修宜均恩渥中奉大夫試禮部尚書兼翰林學士兼太子詹事兼侍讀兼修國史管城縣開國子食邑五百戶賜

紫金魚袋周某學該百氏才擅三長項為中祕之游
實董承明之職大則策小則簡迄用有成藏之山傳
之人可垂不朽雖已遷於舊次亦備錄于前勞賞以
視功格當進秩爰錫贊書之寵用增從橐之華可特
授中大夫依前試禮部尚書兼翰林學士兼太
子詹事兼侍讀兼修國史封賜如故李木行 五月

己未乞外祠降詔不允丁卯夏至祀皇地祇初獻官

東宮講禮記徹章庚辰轉大中大夫

制詞勅朕妙簡
宮僚分講經術

喜戴禮一編之意錄儲闈百執之勤宜被醴恩莫先
端尹中大夫試禮部尚書兼翰林學士兼太子詹事
兼侍讀兼修國史管城縣開國子食邑五百戶賜紫
金魚袋周某賦性敦敏造道深醇敬以仁義與言既
罄論思之益事無小大皆統久兼詹省之官嘉元良
學問之寢成實總正表儀之素立屬訓解之終帙因

遷涉以疇庸爾其祇我寵光率汝僚屬同勉漸摩之力益思輔導之方可特授大中大夫依前試禮部尚書兼翰林學士兼太子詹事兼侍讀兼修國史封如故李本行九月庚午上自太廟

登玉輅入麗正門明堂大禮充執綏官癸未請對乞

外祠十月乙酉朔上批依已降詔不允不得再有陳

請戊子從駕過太乙宮璿璣觀對御五盞乙未進封

開國伯加食邑三百戶

制詞勅朕蒐太室之儀舉明理之典將事之夕尚烟雲之

蔽虧降福自天俄月星而明概廼眷侍臣之列助予
必祀之修宜均餼惠之施載錫光華之寵大中大夫
試禮部尚書兼翰林學士兼太子詹事兼侍讀兼修
國史管城縣開國子食邑五百戶周某道全德粹才

周氣宏夙夜在公咸仰儀刑之懿謀猷告后備殫啟
沃之忠予方翼翼而小心汝皆濟濟而敬事含商吐
角以達和豫炳蕭燎膺而升苾芬神游宴娛景貺昭
答清明登矣慶熙事之備成福履綏之豈朕躬之專
饗載稽彞典並渙恩榮進涉執圭申陪食賦昭事上
帝朕允懷寅畏之誠精白一心爾尚罄交修之效可
特授依前大中大夫試禮部尚書兼翰林學士兼太
子詹事兼侍讀兼修國史進封管城縣開國伯加食
邑三百戶

如故鄭兩行

壬子金國賀會慶節人使朝辭被旨入驛

押宴十一月丙辰除吏部尚書兼翰林學士承旨

制詞

勅天官綜叙羣才翰苑對揚密旨冠侍臣之首選極
儒生之至榮非望高於一時曷身兼于二任大中
夫試禮部尚書兼翰林學士兼侍讀兼太子詹事兼
修國史管城縣開國伯食邑八百戶周某德全至粹

道造大原蚤躡殊科事朕初載發言抗論嚴徐皆義
理之文擣藻揆庭常揚得制誥之體總領數職勤勞
百為勸讀邇英直筆東觀春官典禮履聲直上于星
辰東宮為僚國本自成于羽翼比懇款以求佚為眷
懷而少留宜司銓部之崇仍陟金鑒之長豈惟人才
品藻若水鑒之清明抑使號令文章還古風而粹正
往祇茂渥益勵遠猷可特授依前大中大夫試吏部
尚書兼翰林學士承旨兼侍讀兼太子詹事兼修國
史封如故
鄭丙行
丁巳內批周某已除吏部尚書兼翰林學
士承旨天官事繁今後非特旨撰述其餘並免再入
奏免兼承旨降詔不允

淳熙七年庚子

正月己未金國賀正人使朝辭被旨入驛押宴四月
己酉請對乞外祠庚戌拜不允詔入第二劄辛亥上
批依已降詔不允不得再請五月乙卯講筵讀三朝
寶訓終篇賜金匣端硯鞍馬丁巳賜御筵於秘書省
道山堂己未進謝表并詩戊辰除參知政事御藥吳
回宣押至都堂己巳門司謝安道宣押赴內殿綴新
班賜茶戊寅受經筵徹章轉通議大夫告制詞勅朕
若稽祖訓
覽三朝治要之書進讀經帷資一代儒臣之彥久矣
閱歲茲焉終篇肆疇陪侍之勤庸是褒陞之寵大中

大夫試吏部尚書兼翰林學士承旨兼侍讀兼太子詹事兼修國史管城縣開國伯食邑八百戶周某見聞博洽操履端方堯舜之道陳王前備形獻替文武之政布方策尤藉指明矧朕開虎門訪問之初而爾司螭陛記注之任始終入奉禋益居多屬並叙於賢勞宜莫先於祿秩然朝廷故事姑往服於恩勞可特授通議大夫依前試吏部尚書兼翰林學士承旨兼侍讀兼太子詹事兼修國史封如故施師黜行 又

授參知政事告進封滎陽郡侯加食邑四百戶

制詞
勅尚

書喉舌之司命令由之出納大臣股肱之任紀綱賴以維持宜得時髦俾參國柄通議大夫試吏部尚書兼翰林學士承旨兼侍讀兼太子詹事兼修國史管城縣開國伯食邑八百戶周某性端而道直才周而識宏文追作者之風學通時務之要黃鍾諧衆律備涵太極之和砥柱屹中流坐閱百川之注朕自初載

擢于近涂謀猷悉罄于忠嘉操履克全于堅正承明
三入精白一心黃麻似六經之醇久掌絲綸之命天
官据羣才之會獨專氷鑑之明經緯日效于論思宮
尹首資于調護總領衆職勤勞數年枚數廷臣無出
其右博稽人望素已允孚延登兩社之崇協贊萬微
之化爾其開衆正之路通羣下之情調娛盡納于泰
和豫備迄成于整暇噫名盛而人斯責望益宜砥節
以守公本強則朝有精神允賴折衝而壓難欽予時
訓同底丕平可特授依前通議大夫參知政事進封
滎陽郡開國侯加食邑四百戶食實封一百戶鄭丙
行

六月丙戌遷居政府戊子入謝德壽宮太上皇帝

面賜御書千文一軸七月壬戌同提舉詳定一司勅
令甲子中使賜生日生餼米麪羊酒己卯禱雨天慶

觀聖祖殿八月癸巳以旱災乞行黜責甲午宣押者
再御筆不允己亥雨賜酒果九月丙辰謝雨聖祖殿
辛酉季秋祀上帝初獻官十月丁未會慶節入驛押
伴金國人使宴十二月丙戌四朝史志成宰執赴史
院觀書王管諸司傳旨賜酒賜香藥丙午未時隱岫
奏事曲宴

淳熙八年辛丑

正月庚午轉通奉大夫加食邑五百戶

制詞勅祖功
宗德昭奕世

之規模帝典皇墳新一時之述作肆覽成編之奏聿
嚴遵閣之儲纂我洪儒宜旌舊績通議大夫參知政
事同提舉詳定一司勅令榮陽郡開國侯食邑一千
二百戶食實封一百戶周某學根於六藝文繼於兩
京以淵乎似道之資抗卓爾不羣之志徧儀橐從嘉
謀嘉猷之備聞亟踐柄塗立政立事之無闕克究經
綸之蘊蔚為廊廟之華朕述神廟之丕曩迄獻陵之
盛際敷求俊乂哀次章程仰觀俯察之具陳大綱小
紀之咸載允詔厥後畢志于篇聖繼聖明繼明既全
灝噩之體筆則筆削則削允資潤色之功茲第賞于
勞能項實多於論輯庸超命秩併衍戶畚粹厥寵章
尤其汗簡憶建八書而廣十志有嘉傳信之公熙庶
績而釐百工尚賴同寅之助徃祇明訓益懋遠圖可
特授通奉大夫依前參知政事同提舉詳定一司勅
令加食邑五百戶食實封二百戶木待問行
四月甲戌宣押赴講筵聽讀

正說終篇御藥院吏持賜目賜金帶象簡己卯賜御
筵道山堂五月戊子同宰執以霖雨乞用慶厯故事
一相兩參皆降官以塞災異降詔不允十月乙丑會
慶節入驛押伴金國人使宴十一月庚辰冬至祀上
帝初獻官

淳熙九年壬寅

五月乙未留身乞罷政即往仙林寺門司楊皓宣押
至堂復過寺中晚受不允詔丙申門司甘晷宣押赴

後殿再上表退至省中中使茶湯訖復上馬過仙林
有旨不放出行李不得先出通進司不得接文字晚
再受不允詔丁酉門司李肅宣押赴朝復宣押至堂
九月庚午除知樞密院事門司李肅宣押赴院治事

丁亥受告仍進封滎陽郡公加食邑四百戶

制詞勅
朕由祖

宗之舊章分文武之二柄雖廟堂無甲兵之問每思
遠以憂深而夙夜惟宥密之基宜責專而任重疇咨
近弼晉長洪樞通奉大夫參知政事同提舉詳定一
司勅令滎陽郡開國侯食邑一千七百戶食實封三
百戶周某學造精微氣全剛大自登名于賢級遂接
武于清班問古今則富于崔高掌詔詰則求之元白

極禮樂文章之選聲論思獻納之忠獨步鑒坡久陪
經幄言天下事足以任股肱之寄從吾子游足以成
羽翼之功爰繹師虞陟參機政講求時病屢試囊中
之方通達事情不拘紙上之語載嘉丕績無愧昔人
厚重如勃而文有餘明斷如瑜而才則過是用畀以
本兵之柄俾收蓋世之勲肆予之垂拱仰成賴爾之
謀猷入告噫制挺捷秦楚特兵家一勝之常廣廈論
唐虞有廟筭萬全之策往祗明訓同底丕平可特授
依前通奉大夫知樞密院事進封滎陽郡開國
公食邑四百戶食實封一百戶如故宇文价行 辛巳

明堂大禮充儀仗使十月己酉車駕詣太乙宮壻璣

觀簪花對御五杯兩勸己未會慶節入驛押伴金人

使宴十一月甲戌正謝加食邑五百戶

制詞勅朕祇
率舊章薦修

大饗合祛天地備殫黃畏之誠並侑祖宗式昭功德
之報克贊鉅典實賴元樞逮茲踐事之初宜錫均釐
之慶通奉大夫知樞密院事榮陽郡開國公食邑二
千一百戶食實封四百戶周某才高識遠德厚器宏
外無浮實之名內有顧言之行久參機政嘉旦夕承
陪使列以先期六服羣辟咸視於羽儀千乘萬騎兼
資于督護侍冕旒而展采踐籩豆以薦馨禮三獻而
胥饗通樂六變而風馬降永孚神貺備著賢勞肆增
衍于井封仍陪敦于圭食以昭眷渥以侈邦彞億國
之大事在祀戎已顯肅雖之助治之二柄惟文武更
資道德之威益單厥心並受其福可特授依前通奉
大夫知樞密院事加食邑五百戶
十月戊午赴喜雪
食實封二百戶封如故宇文价行

御筵於尚書省

淳熙十年癸卯

二月壬子未時再奏事隱岫賜酒五行三月癸未車
駕幸玉津園宣赴江亭賜酒三行七月乙亥禱雨社
稷壇是日以旱災乞罷黜宣押降詔不允者再又辭
免生日牲餼丙子御批還政引災已難徇請續齡錫
慶何必預辭辛巳雨宣賜酒果丙戌謝雨社稷壇十
月癸丑會慶節入驛押伴金國人使宴十一月庚寅
冬至祀昊天上帝初獻官

淳熙十一年甲辰

正月己亥入驛押宴六月庚申文德殿宣麻除樞密

使御藥鄧從訓宣押赴院治事有旨立班恩數並依

宰臣辛酉御藥謝安道宣押赴新班壬戌鄧從訓賜

不允批答癸亥門司劉光祖賜不允斷章批答己巳

殿門受告仍加食邑一千戶

制詞門下斗極之臨四海中經天緯之熙神樞

之幹萬兵右躡政途之峻眷我興邦之哲率時基命之嚴暨闡迪於賢猷蓋登昭於使範飭宣丕號告錫治廷通奉大夫知樞密院事榮陽郡開國公食邑二千六百戶食實封六百戶周果端亮而粹夷篤誠而

宏裕問學貫九流之邃文章追三代之醇蚤會休辰
寢敷美業洪鐘發虞隱然天地之和華玉昭庭允矣
邦家之寶雅積經綸之望進毘密勿之謨管攝羣微
治先陳乎上策輯柔四外勢端在於本朝閱歲方深
運籌滋劭朕大明陟典申簡茂榮趣陞位次之崇增
畀事權之重提綱斯在肅太武於本兵衍渥維新極
隆名於宥府移茲多邑益以真租載示殊褒載昭良
績於戲德有常而立武要資政事之修機不密則害
成當謹謨猷之告徃究規恢之蘊訖臻勵翼之勲繫
若元臣詎煩深詔可特授樞密使依前通奉大夫加
食邑一千戶食實封四百戶
封如故主者施行李燾行
十月甲子宣宰執聽講

未濟卦終篇十一月丙戌朔賜御筵道山堂御藥吳

回傳旨賜鞍馬笏帶香茶

淳熙十二年乙巳

公年六十

正月辛卯上辛祀昊天上帝初獻官二月丁卯未時
清華閣再奏事曲宴酒五行戊辰內侍鄭大亨批目
子賜出格茶龍團勝雪番衡墨六月庚辰入奏乞依
慶曆二年故事命宰相兼樞密使辛巳御批續聽處
分十一月辛丑郊祀大禮充儀仗使十二月庚戌朔
大慶殿發太上皇帝壽聖皇后加上尊號冊寶權中

書令前導赴德壽宮奉冊讀冊行事先是又充書冊
文官

淳熙十三年丙午

正月癸巳受南郊加食邑一千戶

制詞門下執特牲而見帝禮莫盛於精

種奉明德以祈天任聿崇於顯相朕欽承鴻祐順攷
彌文藏郊執以備成沛恩休而溥洽粵我本兵之寄
膺時進律之褒渙有寵章格於公聽通奉大夫樞密
使榮陽郡開國公食邑三千六百戶食實封一千戶周某
材宏濟物道重覺民以真儒無敵之資運籌乎帷幄以
賢人可大之業典職乎樞機風化翼宣而持之以寬
洪智畧輻輳而本之於醇正得守文之體於有要明
防患之端於未形朝廷賴以尊安方內聞而悅穆協

氣宣臻於穹壤異儀秩舉於家邦當一陽肇於黃鍾適三歲親祠於紫時明禮備樂集風馬以來歆寢威盛容煥雲龍而在列使端攸建祀事惟寅儼前導以肅雖迄告成而顯鬯宜疇懿績用錫慶條俾衍拓于戶租示亟蒙于祭福於戲懋馨香之治既丕享于神明嚴宥密之基益究勤于夙夜尚祇美況共濟宏圖可特授依通奉大夫樞密使榮陽郡開國公加食邑一千戶食實封四百戶主者施行李嚙行二月

德壽慶典轉正議大夫加食邑一千戶

制詞門下皇天眷命以為

君懋寧親之要道聖人大德而得壽申冠古之鴻名朕履緒明昌膺圖宏遠肆崇昭於丕冊庸茂行於多祺迺眷本兵之賢有嘉東筆之懿哀疏渥敷諗治廷通奉大夫樞密使榮陽郡開國公食邑四千六百戶食實封一千四百戶周某明允惠和端醇簡亮學傳道域益荀羽翼於六經言協忠規益稷股肱於庶

事自服贊襄之任久資康濟之才紓畧術于前籌積
功庸于右府使權增重儒效孔昭大臣之慮四方洞
幾微于未兆司馬之掌九法消姦臆於無形和氣交
孚緝儀備舉會慈宸之介祉勒寶牒以揚輝彌文精
琬琰之書盛事軌篇圖之載庭闡疊慶自天永錫于
萬年帷幄酬勲與相貴同於一等方頒曠澤載飾豐
章以德懋官升峻班朝之秩因田制賦陪荒奠食之
封併示殊榮式存茂獎於戲養莫大于天下聿開備
順之符樞始得其環中共廣愛欽之化誕惟勵翼服
此顯褒可特授正議大夫依前樞密使榮陽郡開國
公加食邑一千戶食實封
四百戶主者施行李嶽行
四月癸亥孟夏祀上帝初
獻官丙子宣召宰執聽讀陸贄奏議終篇五月癸未
赴秘書省御筵九月丙寅入奏乞外祠徑過仙林寺

御藥闕禮宣押赴院降詔不允丁卯御藥張安中宣
押赴朝奏事再納劄子申前張安中復宣押赴院有
旨通進司都門臨安府本府依時上馬不許般移再
降詔不許再請十二月戊寅赴喜雪御筵放尚書省
淳熙十四年丁未

二月丁亥文德殿宣麻轉光祿大夫右丞相加食邑
一千戶食實封四百戶御藥劉興祖宣押赴都堂治
事庚寅門司鄭大亨賜不允批答癸巳御藥劉興祖

賜不允斷來章批答甲午五更御藥黃邁宣押赴朝
立新班提舉國史院提舉編修國朝會要提舉今令

己亥殿門受告

制詞門下分政柄於東西久重樞廷之任咨廟謨於左右並崇宰路之瞻

迺眷鴻儒實嚴宥命越在本兵之長進登次相之尊
爰告听朝式敷坦制正議大夫樞密使榮陽郡開國
公食邑五千六百戶食實封一千八百戶周某某行醇
而守正識茂而憲周經綸包萬變之微綜彙洞群言
之奧修身有道審觀君子之樞機正色在朝稔著賢
人之德業運惟籌於密勿增國體於安彊天下之務
惟幾沉究英謀之秘儒者之效已試寢更華歲之多
茲疇弼直之良務簡忠勞之最熙帝之載禮特厚於
奮庸代天之工職敢輕於理物匪資碩望孰懋宏猷
儀圖爾能夾輔予治乾台彪列象益炳於六符廟鉉

變和勢更隆于九鼎峻陟文淵之秩申開采邑之封稽
于崇階萃此徽渥於戲唐虞建官之制莫先百揆之
司周召作輔之勲實出羣賢之表予欲上參於盛際
汝其遠紹於前修陰陽調則庶類遂其宜刑政清則
蒸民樂其業內俾紀綱之大振外臻疆宇之永寧咸
思翊贊之方庸體倚畀之意尚恢績用奚跖訓辭可
特授光祿大夫右丞相依前蒙陽郡開國公加
食邑一千戶食實封四百戶主者施行李巖行

三月

甲寅遷居右相府五月戊申夏至祀皇地祇甲寅臣

僚論王謙以嘗論薦待罪降詔不允六月丁酉禱雨

皇地祇辛卯以旱災乞罷政往浙江亭宣押者四降

詔不允者再七月壬子禱雨圓壇克亞獻是日具奏

乞免生日牲餼又同王丞相黃參政乞減俸御筆並
依所乞丁卯雨八月壬申奏謝皇地祇辛卯御筆宰
執復舊俸十月癸酉太上皇帝服藥祈禱皇地祇是
月撰高宗謚冊文

淳熙十五年戊申

三月癸卯從憲節皇后謚冊寶入太廟奉冊授寶行
事乙巳從高宗謚冊寶入德壽宮奉冊授寶行事甲
寅高宗梓宮進發攝太傅持節前導靈駕及奠謚寶

監掩攢宮四月辛未回達江下內侍梁彬傳宣撫問
賜銀合茶藥甲戌延和奏事己丑明堂御札降奏皇
地祇五月丁巳差提舉編修玉牒再具奏乞改差劉
正權御筆批依九月己亥明堂大禮朝獻景靈宮初
獻官辛丑大享明堂充大禮使辛酉正謝進封濟國
公加食邑一千戶食實封四百戶

制詞門下明堂布政之宮飭親承於

神祀大臣事君以道咨咸享於天心眷言顯相之賢
屬舉宗祈之禮繫首崇於使範爰踵錫於靈釐丕號
播修羣工典聽光祿大夫右丞相榮陽郡開國公食
邑六千六百戶食實封二千二百戶周某某高明而博

達端亮而醇深以儒者之宗苞古今而會極負天下之
重懋夙夜以奮庸方顯鈞軸之司采峻階符之望朝
倫僉穆政體日新繇心德之交孚措邦家之底乂粵
此季秋之饗冠於列辟之趨靈瑣揭虔肅分於嘉薦
總期昭報祇協於精禋辨章咸秩於彌文勵翼具敷
於頤畫肆茲拜况迄用告成方歆至治之馨香宜溥
湛恩之汪濊顧惟宅揆可後疏榮稽疇公社之華進
啟國封之渥衍荒圭食陪實井腴以豐大猷以蕃徽
數於戲恭默而賚予弼敢忘尊帝之誠緝熙而單厥
心庸倚佐王之效尚欽斯訓益纘乃勲可特授依前
光祿大夫右丞相進封濟國公加食邑一
千戶食實封四百戶主者施行李獻行
十月甲戌

乙亥恭謝景靈宮丙子恭謝太乙宮及本命殿璿璣
觀十一月乙未公留身乞罷政上宣諭傳位太子之

意朕方以此委卿不須留劄子

淳熙十六年己酉

正月己亥文德殿宣麻轉特進左丞相進封許國公
加食邑一千戶食實封四百戶壬寅御藥關禮宣押
綴新班是日以制詞不自安乞祠徑過靈芝寺關禮
宣押赴堂復出靈芝寺癸卯御藥鄭邦憲宣押赴國
忌行香出北關泊仁和館御藥張安仁宣押歸私第
丙午後殿奏事退乞免從駕御藥黃邁就殿門傳旨

上馬相繼行馬從駕回宣押至私第丁未李巖知寧

國府黃邁就堂賜批答不允己酉門司李彥正批答

己未正謝

制詞門下帝咨百揆以亮工蓋取衆賢之協王命六官而分職莫如冢宰之尊朕稽

述洪猷儀圖僭德勝弼諧于政體俾登冠于台司誕有明緡格于公聽光祿大夫右丞相濟國公食邑七千六百戶食實封二千六百戶周某道推先覺行迪大儒稟直方之氣而濟以疏通之才廓高遠之識而輔以醇正之學瞭若著龜之兆理灼見于古今確然金石之姿節靡渝于夙夜踐更二府酌酢萬幾自特進于國鈞廼備宣于賢韞謀謨乎上足以康庶事表厲乎下足以正羣工陰陽理而物遂其宜社稷安而國蒙其利比繇顓任期以首公望采峻于中朝位宜崇于上相紫綬金印之寵即廊肆以不移黃耳玉鉉之

輝與泰符而增煥褒歆斯至倚屬匪輕政已治則尤務于調和勢以安則當思于振飭肆華資之超進仍名社之序陞衍拓爰租申陪真食併從令典式備優恩於戲仲勉為左相于湯實懋日新之德高平觀故事于漢益明時用之宜化惟久可以有成志惟堅可以有立使茂業克安于萬世則令名無愧于前人勉廸訓言欽承眷意可特授特進進左丞相封許國公加食邑一千戶食實封四百戶主者施行李巖行

是日內批兼提舉玉牒監修日曆二月壬戌光宗受禪登寶位三月辛卯文德殿宣麻轉少保進封益國

公加食邑一千戶食實封四百戶

制詞門下朕祗奉慈謀欽承丕緒任

大守重豈夙夜之敢康謨明弼諧繫股肱之攸賴眷予上宰為國宗臣既久翊于熙朝茲首禪于初政宜

疏異渥以答殊勲爰輯廷紳誕敷詔綍特進左丞相
許國公食邑八千六百戶食實封三千戶周某忱恂
而博達端亮而粹夷經濟之才足以開物而成務淵
源之學始于誠意而正心頃自機廷晉登揆路修明
百度雖小物而克勤酬酢萬微遇大事而能斷民瞻
益聳國勢愈強仰惟壽皇將舉內禪厥既傳之以道
又復遺之以賢乃升冠于冢司俾務成于聖計屬茲
繼體方慶澤之廣覃其于褒功詎微章之可後肆升
華于亞保庸增重于元台併開大國之封申衍爰田
之食式昭矜遇深厚倚毘於戲聖賢相逢治畢張宿
己彰于成效后臣克艱政乃乂今方竚于嘉猷益究
乃心奚俟多訓可特授少保依前左丞相進封益國
公加食邑一千戶食實封四百戶仍令
所司擇日備禮冊命主者施行倪思行
公五具辭免
皆降詔不允辛丑乞序位在嘉王之下御批不允四

月丙寅皇帝親饗太廟克禮儀使五月乙未乞解機政降詔不允宣如儀丙申入第二第三第四奏是日

諫議大夫上殿丁酉除觀文殿大學士判潭州

制詞門下三孤

洪化允資弼亮之謨十國為連更賴蕃宣之略任雖殊于內外寵不異于始終爰即所廷誕揚丕號少保左丞相益國公食邑九千六百戶食實封三千四百戶周某量宏而識遠德鉅而才全文高黼黻之華學富經綸之妙忠勤體國孜孜而無不為通敏濟時綽綽乎有餘裕繫天下之重望結慈宸之深知預大政而執洪樞送司二柄繇次相而登上宰光輔兩朝舜傳有詔于詒謀益贊克禪于繼治肆陞亞保增峻元台肱股良而庶事康方觀成效紀綱張而衆目舉甫立宏規俄遽露于需章願亟還于相印諭旨丁寧而

莫奪陳情堅確而弗移既雅志之重違在茂恩而宜厚是用付以長沙之巨屏俾作牧于上游寵以書殿之大名仍通班于左棘因替眷懷之渥式昭體貌之優進退有光觀瞻咸聳於戲作舟楫汝用惜不為于朕留毋金玉爾音尚樂殫于我告免祇明訓益懋外庸可特授觀文殿大學士依前少保判潭州軍州事兼管內勸農營田使克荆湖南路安撫使馬步軍都總管益國公食邑食實封如故施行倪思行壽

皇御筆賜金器香茶戊戌再上辭免仍乞以元官奉祠殿中侍御史乞因辭勉從所請是日除醴泉觀使戊申次宜興七月乙亥泝江九月戊辰至吉

紹熙元年庚戌

三月二日孫顯生十月戊申除判隆興府

制詞勅潛藩督府夙

推地望之雄舊弼名臣不替瞻懷之厚屬茲謀帥重
謂得賢爰錫褒緡式昭茂渥少保克醴泉觀使益國
公食邑九千六百戶食實封三千四百戶周某某身端
而行備學富而才華才無施而不宜言所庶而可績
光輔兩朝之治具著忠忱獨高三事之班允膺休寵
自祠庭之均逸亦歲籥之已更眷言江湖之都上應
翼軫之次與我共理實藉于循良視邦選侯莫如于
名德是用起之閑適任以蕃宣孤棘所臨俾方維之
增重鄉枌是統在畫繡以尤榮既素稔于民情宜易
施于善政噫召伯之教明于南國有遺愛之不忘韋
丹之功被于八州尚良規之可考勉祗明命無愧昔
人可依前少保特授判隆興軍府事兼管內勸農營
田使充江南西路安撫使馬步軍
都總管封食實封如故倪思行
公入奏再辭免降

詔宜允

紹熙二年辛亥

八月壬午除觀文殿學士判潭州

制詞勅書殿通班無若延恩之俊价

藩作屏尤推連帥之崇眷言寅亮之賢久遂燕閑之適肆中前命用起舊人少保克醴泉觀使益國公食邑九千六百戶食實封三千四百戶周某經綸全才羽翼宿望光輔重華之治進位冢司親逢一道之傳弼予初政乃剡章而有請祈上印以歸休寵以學士之隆名畀以長沙之巨鎮旋易祥源之使領沔閱歲華近剖豫章之守符屢勤諭旨莫移素守姑遂雅懷朕惟均勞逸者雖人主之恩分憂顧者實大臣之誼是用再頒初詔俾殿上游噫周公分東陝之權益使侯方之重召伯明南國之教坐觀民俗之醇尚體眷懷

巫祇褒渥可依前少保特授觀文殿學士判潭州軍州事兼管內勸農營田使充荆湖南路安撫使馬步軍都總管封食實三辭免降詔不允十一月己巳至封如故倪思行

潭郊恩加食邑一千戶食實封四百戶

制詞門下周祀昊天頌播

肇裡之美漢祠雍時史嚴初見之書朕踐祚以來卜郊云始考丕彛而循舊煥編典以惟新眷言寅亮之賢實任藩宣之寄宜旌褒緋用錫神釐少保觀文殿學士判潭州軍州事兼管內勸農營田使克荆湖南路安撫使馬步軍都總管益國公食邑九千六百戶食實封三千四百戶周某端肅而惠和忱恂而宏達貳公洪化首毘初政之成十國為連載倚上游之重甫開藩而作牧阻相祀之趨班輸貢篚以在庭入包茅而供祭迨茲竣事可後疏恩爰增采邑之封策聳幹方之望於戲姬公之分東陝莫陪入禩之儀賈傅

之在長沙孰對受釐之間肆因均福尤切注懷尚體
眷私益彈忠藎可依前少保觀文殿學士判潭州軍
州事兼管內勸農營田使克荆湖南路安撫使馬步
軍都總管益國公加食邑一千戶食實封四百戶主
者施行
倪思行

紹熙三年壬子

六月甲子受復觀文殿大學士告

制詞門下朕序進
臣工率循彛憲惟

延恩之峻職在書殿以最高惟學士之大名非舊弼
而莫昇眷予亞保作牧上游爰播明綵存頒前命少
保觀文殿學士判潭州軍州事兼管內勸農營田使
克荆湖南路安撫使馬步軍都總管益國公食邑一
萬六百戶食實封三千八百戶周某某道隆致主德威
格天顙魁柄于兩朝用密藏于輔贊典方維于十國

績藹著于藩宣聲實愈孚眷懷深厚朕若稽皇祐加
獎昌朝始敝紫宸之宮班用極鴻儒之殊寵矧如宿
望有邁昔賢故于上印之時嘗煥出綸之渥茲申初
詔殆踰華袞之榮式茂新恩盡復青纁之舊以示至
公之道以昭馭貴之權丕聳民瞻增雄帥閭於戲賢
者素輕乎富貴夫豈計得失之間朝廷莫重于名器
蓋將寓黜陟之典注祗猷訓益懋勲庸可依前少保
特復觀文殿大學士判潭州軍州事兼管內勸農營
田使克荆湖南路安撫使馬步軍都總管益
國公食邑食實封如故主者施行倪思行

公再入

奏辭免降詔不允不得再有陳請七月庚申坐舉監

文思院常良孫降榮陽郡公

制詞門下國家設薦舉之科所以廣求才之路

嚴保任之法所以懲失實之愆欲昭示于至公爰必行于近列眷時舊弼允謁宗臣偶累知人之明可逃

紂爵之罰肆敷訓告用協彞章少保觀文殿大學士
判潭州軍州事兼管內勸農營田使克荆湖南路安
撫使馬步軍都總管益國公食邑一萬六百戶食實
封三千八百戶周某德茂恢洪道存忠恕班莫高于
九棘寄方重于十連以人事君夙著秉鈞之日舉賢
報國晚堅推轂之誠屬一時管庫之卑乃再世臺臣
之後徒知名閭之是取弗悟偽言之見欺既貪墨之
有聞尋察覺而奚及雖非深咎難廢薄懲稍錮公社
之封仍厚邑租之入庶申儆戒靡替眷懷於戲過可
知仁已初心之曲諒復斯無悔尚後效之勉圖其體
隆寬以綏吉履可依前少保觀文殿大學士判潭州
軍州事兼管內勸農營田使克荆湖南路安撫使馬
步軍都總管降榮陽郡開國公食
邑食實封如故主者施行倪思行

紹熙四年癸丑

八月丙辰受復益國公告

制詞門下行法由近而始
既示天下以公知人自

昔所難要當諒君子之過矧已臻于滿歲宜俾復于
舊封誕布明綬式孚群聽少保觀文殿大學士判潭
州軍州事兼管內勸農營田使克荆湖南路安撫使
馬步軍都總管降榮陽郡開國公食邑一萬六百戶
食實封三千八百戶周某德全而才鉅識遠而量宏
勲在兩朝望尤高于左棘政成九牧詠咸美于甘棠
頃景慕于前脩肆矜錄其後裔遂垂保任有昧賢愚
繆舉必懲罰雖加于紕爵閔時云久恩可後于滌瑕
爰按邦彛叙還公社以謹馭臣之典以彰補過之休
於戲胙土分茅茲全歸于賜履推賢報國其勿替于
初心茂對寵光益殫忠藎可依前少保觀文殿大學
士判潭州軍州事兼管內勸農營田使克荆湖南路
安撫使馬步軍都總管特叙復益國公
食邑食實封如故主者施行倪思行

十二月己酉

改判隆興府癸丑辭廟甲寅交印乙卯出城

紹熙五年甲寅

正月庚午至吉戊寅判隆興府告至

制詞勅詔起東山已報長沙之

政符分南服尚提新府之封乃瞻元台載揚明訓少
保觀文殿大學士判潭州軍州事兼管內勸農營田
使克荆湖南路安撫使馬步軍都總管益國公食邑
一萬六百戶食實封三千八百戶周某某閎深而肅括
堅正而裕和極論思獻納之工盡輔贊彌縫之用始
終一節光顯三朝進退百官聚英才而在列總領衆
職任大事以攸宜方安葦館之閑往鎮藩方之遠眷
懷不替委寄則均政化流傳有顯上公之分陝威名
孚洽共期大老之歸周惟此南昌尤為要地爰命三
孤之重式邁十乘之行矧爾寓居之鄉實今賜履之

下既喜衮衣之寢近抑知畫綉之有光先聲所臨羣
聽自聳噫令行庭戶當還帶牛佩犢之風福及京師
更致自葉流根之效來綏四國式憲萬邦可依前少
保觀文殿大學士特授判隆興軍府兼管內勸農營
田使克荆湖南路安撫使馬步軍
都總管封食實封如故樓鑰行 丁亥拜辭免不允

詔入第二奏二月丁巳受醴泉觀使勅五月甲子今

上即位準詔言事八月甲寅宣麻轉少傅加食邑一

千戶食實封四百戶

制詞門下朕祇膺駿命寅紹丕
圖舊弼偃藩南遂內祠之佚需

恩進律是升亞傅之崇乃輯羣工用敷渙號少保觀
文殿大學士克醴泉觀使益國公食邑一萬六百戶
食實封三千八百戶周某某道隆而德備實茂而聲聞
自有書契以來悉能該綜首以詞章之選入踐

原缺

高文大冊震耀四方逮參柄于事樞

尋進專于國柄謀謨經遠任社稷以不疑精神折衝
撫華夷而咸肅久辭相印起殿帥垣退為綠野之游
自適東山之志眷冲人之嗣服方歌永助之詩想元
老以興懷當下乞言之詔茲頒異數就陟孤卿夏篆
通彊班寢高于左棘袞衣赤舄禮增煥于三槐仍衍
故封併增真實於戲嘆股肱之美庸加貳公洪化之
名進葯石之規式究致君澤民之蘊尚孚明命毋有
遐心可特授少傅依前觀文殿大學士充醴泉觀使
益國公加食邑一千戶食實封四百戶入令所司擇
日備禮冊命主者施行樓鑰行公入奏及上表辭免皆降詔不允十

月甲子上遣閤門簿書武功大夫趙嗣祖承受成忠
郎王松賜少傅告再上表辭免降詔不允四入奏乞

回受有旨依所乞九月明堂加食邑一千戶食實封

四百戶

制詞門下朕嗣守邦國肇修宗祀父天母地祭既重于合祛尊祖敬宗禮尤嚴于並侑予

一人越紼以行事爾多士奉璋而侍祠爰眷舊以興思詎慶條之可後誕敷渙號敷告昕庭少傅觀文殿大學士克醴泉觀使益國公食邑一萬一千六百戶食實封四千二百戶周某某簡重而閎深直方而膚敏典誥上規于姚姒詞章遠軋于漢周弼亮兩朝未究經綸之蘊鎮安四海有懷康濟之功偃藩南國之雄均逸東山之勝比以霽恩之渥升之亞傅之崇注想不忘乞言方切屬仲大報爰啟合宮載謀載載惟聖父嘗頒于先甲我將我享季秋乃卜于仲辛熙事既成蕃釐來介申衍多田之賦仍加真實之封於戲明堂王者之堂方荷神休之荅三老天下之老宜先祭澤之施尚迪遠猷永綏殊寵可依前少傅觀文殿大學士

克醴泉觀使益國公加食邑一千戶十一月辛亥公
食實封四百戶主者施行樓鑰行

遷新第蓋貢院舊基公嘗預薦于此乃名堂曰克賦
東偏闢園數畝地勢坦夷名之曰平自號平園老叟
慶元元年乙卯

公年七十

正月丁亥朔三上表乞引年致仕七月庚寅宣麻轉
少傅致仕加食邑一千戶食實封四百戶

制詞門下
援禮經而

告老大臣所以循止足之規稽邦典以疏恩人主所
以茂褒崇之渥朕眷懷耆舊渴想高風揚于大庭

疎乃羣聽少保觀文殿大學士克醴泉觀使益國公
食邑一萬一千六百戶食實封四千二百戶周某某才
宏而識遠行峻而氣和其學以致知為先其文以明
道為本有一德如伊尹任重保衡亮四世如畢公望
隆壽俊身雖繫于軒冕心常樂乎丘樊項辭洪井之
麾復領祥源之使年齡甫及筋力未衰而乃疊貢封
章懇還官政朕惟賜几而不得謝蓋具著于前曩垂
車以保其榮殆難從于推志勉諭優賢之旨莫回勇
退之祈念重違於惻誠宜優加于體貌是用陞班孤
傳載申成命之休增賦爰田仍衍真租之食以示寵
光之備以昭名節之全孰不嘆息于賢哉足以興起
乎聞者於戲進夫棘位益資洪化之謨迎以蒲輪尚
有乞言之禮惟深于道者無殆辱之累惟忠于國者
何仕止之殊徃綏壽祉之多勿替謀猷之告可特授
少傅依前觀文殿大學士益國公致仕加食邑一千
戶食實封四百戶令所司擇日備禮冊命主者施行

倪思
行

慶元二年丙辰

慶元三年丁巳

三月戊子綸倅臨川公作十以箴送行十一月郊恩

加食邑一千戶食實封四百戶

制詞門下清廟茅屋
王入裸以展容甘泉

竹宮臣臨壇而拜貺維皇家之懿觀侈舊弼之陪班駿
奔而執豆籩唯飭司存之典鴻飛而歸袞繡庶咨尊
老之詢雖隔儀刑特優慶澤少傳觀文殿大學士致
仕益國公食邑一萬二千六百戶食實封四千六百
戶周某中和而簡亮精密而閎深究百氏之異同亦
歸于道漱六藝之芳潤以昌其文積粹望于四朝紀

茂庸于兩祔既明且哲早遂潔身俾壽而臧久安介
福屬藏初郊之祕聿嚴並侑之恭冬授策于泰元迄
展奉瑄之禮夜受釐于宣室迥凝前席之思飭增行
于豐腴亶褒榮于冲逸不遐有佐適觀厥成嗚呼熙
漢時雍神休曾阻侍祠之列保魯邦錫公嘏尚懷夾
輔之規祗繹隆恩永綏令祉可依前少傅觀文殿大
學士致仕益國公加食邑一千戶食
實封四百戶主者施行傅伯壽行

慶元四年戊午

慶元五年己未

慶元六年庚申

九月明堂加食邑一千戶食實封四百戶

制詞門下
朕因時而下

興禮練日以交神薦收御辰適萬寶西成之際房宿
占象飭九筵南鄉之儀孝奉天地之臨靈承祖宗之
脩竣事方頒為祭餼疏恩豈後于耆英錫以明綬告
于列位少傅觀文殿大學士致仕益國公食邑一萬
三千六百戶食實封五千戶周某某器資偉亮業履清
醇閤中肆外之文本于殫洽經體贊元之用懋乃弼
諧風躋位棘之班久遂垂車之佚鄉黨欽其德行神明
相其壽祺屬稽三歲之經載肅四阿之宇禮崇越紳
祀不敢以廢尊胙有均釐惠靡忘于及下因念先朝
之宿望屢陪大典之休成以溫厚之詞代宣于祭澤
以烈文之輔助格于臨心今雖適于里居顧可稽于
邦賚申陪多升之賦併衍其畬之封以廣祐休以昭
敬異於戲罔不惜祀是為商家之隆未有遺年亦繇
虞氏而始朕欲兼全于斯義時庸加獎於舊臣祗服
徽章益綏純嘏可依前少傅觀文殿大學士致仕益
國公加食邑一千戶食實封四百戶主者施行陳宗

召行

嘉泰元年辛酉

二月監察御史覺察呂祖泰上書及公姓名特降少

保

制詞勅大臣從故里之安務曲全于優禮王者審治朝之聽曾可廢于公言肆予纂紹于丕圖稽古

率循于茲道有衆弗協固難獨私少傅觀文殿大學士益國公致仕食邑一萬四千六百戶食實封五千四百戶周某某身受國恩名推時望文章議論早膺烈祖之選掄典禮時幾尤重慈皇之注倚歲月推移于三紀風雲感會于千齡翕九德以敷施寧分同異褒二人而有合罔間初終庶全天下之為公不愧先民之時若乃拂協和之義浸罹奮昵之偏馴致狂生扇成偽習視群才之進退分私黨之盛衰沿類相從殆

水流而火就暢萌以泯幾陰長而陽消慨流弊之及
今謂造端之自汝尤指元台之重欲過退傅之歸自
為明哲之保身則異于是有匪春秋之責備不在茲
乎駭輿論之沸騰溢臺評之枚數獨念辭榮之久固
應用罰之寬姑抑穹班庸儼有位缺棄人間事而學
輕舉知久忘寵辱之驚引里俗識而志窮愁諒一洗
愛憎之累尚休晚末無負隆寬可特降授少保依前
觀文殿大學士益國公致仕食邑食實封如故邵文
行炳

嘉泰二年壬戌

四月庚子綸赴贛倅公有詩送行十二月內批復元

官

嘉泰三年癸亥

正月丙子復受少傅告

制詞門下混同天下而一之中宣示大公之道體貌大臣

而厲其節載疏馭貴之恩眷言綠野之英偶麗丹書之籍復孤卿而眎舊渙寵數以維新播告大廷誕敷明命降授少保觀文殿大學士益國公致仕食邑一萬四千六百戶食實封五千四百戶周某閑深而簡重溫裕而剛方博物洽聞貫百家九流之興高文大冊追三代兩漢之醇思陵愛其有制誥之才孝廟識其真宰輔之器贊虞舜垂裳之制久逸于明謨洎神禹若帝之初力禪于新政庶官無曠百職惟熙懇辭機務之繁旋俾保釐之重衣錦動故鄉之喜建瓴陞亞傅之崇進退可觀始終罔間時事靡聞于掛口家居惟樂于著書駭匹夫狂悖之上聞乃片言誑誤之併及既有疑于三至始薄禡于一階朕方建皇極而

融會于黨偏尊重闡而濡浹于慶施申念先朝之遺
老僅同下國之靈光寧屈彛章以全晚節屬外親之
詣闕在更生初豈與知貶宮保以居閒矧彥博之嘗
得謝爰侈便蕃之渥盡還寅亮之聯仍方社之舊封
示安居之偉觀於戲福威惟辟朕庶幾偕玆命復之
公明哲保身爾固無三仕三已之累益綏壽履祇服
恩私可特復少傅依前觀文殿大學士益國公致仕
食邑一萬四千六百戶食實封五千四百戶主者施
行顏行顏五月壬子綸被審察之命十月除大理司直壬
械行

子益國夫人王氏薨十一月郊祀加食邑一千戶食

實封四百戶

制詞門下朕三酌彌文恭承明祀王入
太室首嚴裸鬯之儀帝臨中壇載舉燎

熏之禮荷靈旂之來霈宜國祚之均頌乃瞻舊人亶
謂耆德爰孚渙號臨告明廷少傅觀文殿大學士致

仕益國公食邑一萬四千六百戶食實封五千四百戶周某器量宏深才猷通敏有覺德行夙並駕于淵騫發為文章蓋上規于姚姒早被聖神之賻浸膺廊廟之求翊贊兩朝密勿敷陳之際始終一節雍容進退之間蹇蹇王臣皤皤國老遂間館珍臺之適乘安車駟馬之榮十里封公啟梁州之沃壤三孤命秩魚文殿之隆名竊觀日至之主虔奉雲陽之玉神光交燭是宜降福之多祭澤旁流可後加田之寵茲為異數允屬宗工於戲奉郊廟之精禋雖莫陪于顯相緒旃常之成績亦何愛于褒嘉其服茂恩益堅晚節可依前少傅觀文殿大學士致仕益國公加食邑一千戶食實封四百戶主者施行莫子純行

嘉泰四年甲子

三月甲申葬益國夫人于廬陵縣儒林鄉斗岡之原

公為誌銘十月旦公薨于正寢享年七十有九遺奏

聞上輟朝兩日贈太師賻銀絹一千疋兩

制詞勅朕遵先王之

法言念今日祖風之未遠感故國之喬木嘆當時朝
士之無多嗟言調鼎之英久遂掛冠之適忽遺言之
來諗詎愍冊之可稽故少傅觀文殿大學士致仕益
國公食邑一萬五千六百戶食實封五千八百戶周
某智周萬殊學鏡千古以文華國豈惟莊騷太史之
工以道事君屢展稷契皋陶之畫初振詞臣之譽旋
疇真宰之庸既練習于國章尤精通于世務亮衆采
于台極烈祖恃為股肱捧大明于天衢聖父資其羽
翼項以棘班之峻往分帥閫之權雖餞于鄙者有以
冊申伯之勲然浴乎沂者無以奪曾點之志遂致大
夫之事聿觀晚節之香爵列三孤寄傲每存于林壑
年幾八袞所精弗倦于簡編云胡一鑑之亡莫起兩

楹之夢錫之密印襪以衮衣於戲我咸成文王之功
靡忘繩武爾尚式周公之訓宜俾為師貢于寔封服
我光命可特贈太師
餘如故李大異行
十二月丙申合葬于斗岡之原

開禧三年丁卯

二月辛酉賜諡文忠

諡議見
附錄

嘉定元年戊辰

十一月內侍張延慶傳旨宣賜御書忠文耆德之碑

六字并詔詞臣撰書碑銘

文載
附錄

宋史列傳

周必大字子充一字洪道其先管城人祖詵倅廬陵因家焉父利建太學博士必大第進士授徽州戶曹中博學宏詞科教授建康府除太學錄召試館職高宗讀其策曰掌制手也授祕書省正字館職復召試自此始兼國史院編修官除監察御史孝宗踐阼除起居郎又兼權中書舍人應詔上十事皆切時弊權給事中繳駁不辟權倖上曰意卿止能文不謂剛正如此曾覲龍大淵

得幸遷知閤門事必大與金安節不書黃旬日申前命
必大格不行遂請祠去久之差知南劍州改提點福建
刑獄除秘書少監兼直學士院無領史職鄭聞草必大
制上改竄其末引漢宣帝事必大因奏曰陛下取漢宣
帝之言親制贊書明示好惡臣觀西漢所謂社稷臣乃
鄙朴之周勃少文之汲黯不學之霍光至於公孫弘蔡
義韋賢號曰儒者而持祿保位故宣帝謂俗儒不達時
宜使宣帝知真儒何至雜伯哉願平心察之不可有輕

儒名上喜其精洽兼權兵部侍郎尋權禮部侍郎兼直
學士院同修國史實錄院同修撰一日與王之奇陳良
翰同召對上出手詔舉唐太宗魏徵問對以在位久功
未有成命必大等極陳當否退而條上謂陛下練兵以
圖恢復而將數易是用將之道未至擇人以守郡國而
守數易是責實之方未盡諸州長吏倏來倏去吏姦何
由可察民瘼何由可蘇上善其言為革二弊又兼侍講
兼中書舍人未幾辭直學士院從之張說再除簽書樞

密院給事中莫濟封還錄黃必大奏貴戚預政公私兩失臣不敢具草上批濟必大予宮觀說露章薦二人於是濟除温州必大除建寧府必大至豐城稱疾而歸三以祠請累遷吏部侍郎除翰林學士久雨奏請減後宮給使寬浙郡積逋命省部議優恤內直宣引論金星近前星武士擊毬太子亦與臣甚危之上俾語太子必大曰太子人子也陛下命以驅馳臣安敢勸以違命陛下勿命之可也除禮部尚書兼翰林學士進吏部兼承旨


詔禮官議明堂典禮必大定園丘合宮互舉之議在翰苑幾六年制命溫雅周盡事情為一時詞臣之冠或言其再入也實曾覲所薦而必大不知除參知政事有介椒房之援求為郎者上俾諭給舍繳駁必大曰臺諫給舍與三省相維持豈可諭意不從失體從則壞法命下之日臣等自當執奏上喜曰肯如此任怨耶必大曰當予而不予則有怨不當予而不予何怨之有上曰此任怨非任怨也除知樞密院遂拜樞密使上諸軍升差籍

時點召一二察能否主帥悚激無敢容私叛諸軍點試
法其在外解發而親閱之池州李忠孝自言正將二人
不能開弓乞罷軍上曰此樞使措置之效也淳熙十四
年拜右丞相首奏今內外晏然殆將二紀此正可懼之
時當思經遠之計不可紛更欲速封事多言大臣同異
必大曰各盡所見豈可尚同陛下復祖宗舊制命三省
覆奏而後行正欲上下相維非止奉行文書也十五年
明堂加恩封濟國公十一月留身乞去上獎勞再三忽

宣諭比年病倦欲傳位太子須卿且留必大言聖體康寧止因孝思稍過何遽至倦勤上曰禮莫大於事宗廟而孟饗多以病分詣孝莫重於執喪而不得自至德壽宮欲不退休得乎朕方以此委卿必大泣而退明年正月拜左丞相許國公留正拜右丞相二月二日行內禪禮語在本紀中光宗立問當世急務奏用人求言二事三月拜少保益國公何澹為司業久不遷留正奏遷之澹憾必大而德正至是為諫長遂首劾必大詔以觀文

殿大學士判潭州坐所舉官以賄敗降滎陽郡公復益國公改判隆興府除醴泉觀使寧宗即位求直言奏四事曰聖孝曰敬天曰崇儉曰久任慶元元年三上表引年遂以少傅致仕御史施康年劾必大唱僞徒植黨與詔降少保自慶元以後侂冑之黨立僞學之名以禁錮君子而必大與趙汝愚留正指為罪首後復少傅年七十九卒贈太師諡文忠帝篆其墓碑曰忠文耆德之碑自號平園老叟著書八十一種有平園集二百卷嘗建

三忠堂於鄉謂歐陽文忠修楊忠襄邦乂胡忠簡銓皆
廬陵人必大平生所敬慕為文記之蓋絕筆也



文忠集卷首